

Die Schöpfung

De Oba sitzd uff de Bonk hinnam Haus.
Sei Enkelsche grraweld em uff de Geere.
Er frohd dem Großvadda de Sellsack eraus.
Wie soll der dem Knirbs bloß alles erklääre?
Er häämeld em sei Wuschelkobb und sahd:
„Mei Bub, bischd ejendlisch joo nimmeh so kläään;
sollsched erfahre, wer die Weld unn alles gemach hat.
E bissje wirschde schunn devunn vastehn.“



Die Weld war e großer, dunkler Ball,
kahl, läär unn kald iwwaall.

Do hadde Hergodd mit seiner Kraft
om erschde Dah mool Lischd geschaffd.

Om zwedde Dah hadda es Lond aus em Wasser gehob,
hadd Himmel unn Erd ausenanner geschob.

Das Lond haddem awwer noch nitt rischdisch gefall.
Do hadda Bääm unn Kraut wachse geloss iwwaall.

Unn domid war de dridde Dah aach schunn erum.
Om vierde is donn de Himmel drohn kumm.

Sunn, Mond unn Sterne sinn entstonn,
dass ma Johr unn Dah aach zähle konn.

Widda hadda hin unn häär iwwaleed,
was donn Lond unn Wasser belääwe dääd.

Inzwische war schunn de finfde Dach;
Do hadda sämdlisches Viehzeisch gemach.

Jetzt war soweid alles gudd unn scheen –
bis uff ebbes – er war immer noch allääan.

Zufriede war er noch nitt so gonz.
Irschendwie fähld em de letschde Glonz.

E Weese meschd er schaffe, das ungefähr
die Kreenung vunn all seiner Aawed wär.

Donn hadda om allerletschde Dah
E Monn gemach – unn fa denne e Fraa.

Vunn der schwär Aawed mied unn kabudd
hadde Herr sisch om sibbdé Dad ausgeruhd.

Doonoo werfd er e Blick zerick
Unn mennd: „Der Mensch is mei Meischderstick.

Isch honnse aarisch lieb, honn nur fa sie
die Weld gemach, die Flonze unn es Vieh.

Es soll ne gudd gehn, isch will fa se sorje.
Hie owwe, im Gaade Eden, do sinn se geborje.

Awwer sie solle misch als ihr Vadda bedrachde
Unn brav unn gehorsam mei Gebodde beachde.“

Doch die zwei honn halt – wie's Kinna so mache –
om liebschd ausprobierd die vaboddene Sache.

Sie honn geheerd uff e falschi Schlong
unn sinn on vaboddene Frischde gong.

Dass das gonz unn gar nitt rischdisch war,
war ne iwrischens soford klar.

Sie honn's mid onnere Aue bedrachd
unn gesiehn, was se vakehrd gemach.

Doo honn se sisch geschämd unn schnell vestackd.
Doch de Hergodd hadd se gleisch endeckd.

Ooje, doo war do owwe vielleischd was los.
Dem Herrgodd sei Raasch war riesegroß.

Er hadd ne de beese Finger gewies
unn se rausgeschmiss aus em Paradies.

„Enaus,“ hadda gebrilld, „enaus mid eisch zwei.
Mid eierm scheene Lääwe isses vorbei!

Ihr solle,“ hadda ne noogeschrie,
„schwäär schaffe vunn moins in de Frieh

bis oowens späd, dass na nur so schwitze,
onstatt vabodd'ne Äbbel stibitze!“

Vunn doo on honn die zwei es bekebbd,
dass es jetzt nur noch äänes gebbd.

„Schaffe“, wenn se wolle bestehn.
Joo, mei Kneschd, so war's domols gewäään.

Die Mensche misse schaffe, wie domols so heit.
Unn so wird's aach bleiwe alle Zeit.
Awwer was isch gonz bestimmt wääß:
Unser Vadda im Himmel is uns gar nimmeh bees.
Das kamma dodroon gudd erkenne,
er duud uns heit noch „sei Kinna“ nenne.

Isses mol soweit unn isch muss vunn hie gehn,
duun owwe vor meinem Schepfer stehn,
donn sahn isch: Es war hard awwer scheen.
Danke Herr, fa alles. Villmols dankescheen.

De Klääñ war inngeschloof, er siehd wie e Engel aus.
De Oba drahed ne uffem Arm ins Haus.
Er denkt: Das Kind hadd joo nix vastonn,
awwer mir hadd's emol gudd gedohn.
Mir Mensche duun zu gäär vagesse.
Ma solld effda mol in da Bibel lääse!

